

Giubileums da la Viafier retica

■ (cp) A chaschun dal giubileum da 125 onns da la Viafier retica e da la Viafier d'Arosa mussa la biblioteca chantunala dal Grischun in'expoziun che documentescha – a maun da material da la biblioteca chantunala e da l'archiv dal stadi – il cumenzament d'ina istorgia da success. Averta vegn questa expoziun cun in discurs da lavuratori

sur da la lavur da retschertga davart il tema «Viafier retica».

Mesemna, ils 17 da settember 2014 envida la biblioteca chantunala dal Grischun a l'avertura da l'expoziun davart il tema «125 onns Viafier retica e 100 onns Viafier d'Arosa» che ha lieu en il 1. plaun da la biblioteca chantunala. En in discurs da lavuratori dattan experts da re-

num da la Viafier retica invistas interesantas en lur lavur. *Ruedi Bruderer*, redactur tar RTR, vegn a quintar davart sia lavur da retschertga per differents films sur da la VR e l'istoricher d'art *Leza Dosch* vegn a dar ina invista en las lavurs d'inventarisaziun currentas dals stabiliments e dals edifizis da la Viafier retica. Il locomotivist *Gion Caprez* raquinta da sia lavur sco autur e curatur dal Museum da viafier Alvra e l'archivar da la VR da blers onns *Gian Brügger* rapporta davart sias documentaziuns voluminusas en connex cun il tema da la Viafier retica.

Tut ils quatter referents mussan tge obstachels ch'els han stuì surmuntar tar la tshertga da funtaunas per lur lavur e raquintan da grondas surpraisas e da muments da success durant lur retschertgas. Cun anecdotas interessantas mainan ils referents tras il tema «Viafier retica». Il discurs da lavuratori vegn accompagnà da curtas preschentaziuns fotograficas e filmicas e moderà da l'archivari dal stadi *Reto Weiss*.

L'expoziun en la biblioteca chantunala fa – a maun da documents da maletgs e da texts da la biblioteca chantunala e da l'archiv dal stadi – in viadi da temp interessant enavos al cumenzament da la Viafier retica che fascinescha e surprenda anc adina. Dilucidads vegnan en quest connex differents aspects tematics da l'istorgia da la Viafier retica sco per exempel il progress tecnic, las structuradas dal persunal u l'impurtanza turistica da la construcziun da la VR per il chantun Grischun.

Durada da l'expoziun: dals 18 da settember fin ils 30 da december 2014
Avertura cun discurs da lavuratori: ils 17 da settember 2014 a las 18.00, en la biblioteca chantunala dal Grischun, Karlihofplatz, Cuira.
 L'occurrenza è publica e l'entrada è libra.



Per l'avertura da la Viafier Cuira–Arosa.



Prospect da la Viafier retica 1907.